

# Spanne moet hard baklei om seges in Superliga

**Morris Gilbert**

**D**ie twee pasaangeërs in die 2018-reeks om die Superliga-kroon, UP-Tuks en Naka Bulle, moes die afgelope Saterdag harder as gewoonlik werk vir oorwinnings in hul wegwedstryde teen onderskeidelik Impala in Rustenburg en East Rand United (ERU) in Boksburg.

Met hul oorwinning teen Impala (34-20) het UP-Tuks seker gemaak dat hulle die enigste onoorwonne span in die kompetisie word nadat die tuispan tot voor dié wedstryd ook hierop kon aanspraak maak.

Dit was Impala se eerste nederlaag in vier wedstryde en UP-Tuks se vyfde oorwinning in dieselde getal kragmetings. UP-Tuks het volpunte op die puntelyst (25/25).

Hoewel UP-Tuks vier drieë teenoor die tuispan se een gedruk het, het Impala met kli-



niese skopwerk pale toe in die wedloop gebly en was hy in 'n stadium in die tweede helfte net met 27-20 agter. Die plaaslike skeidsregter het sy mes van begin tot einde vir UP-Tuks ingehad wat dit soveel makliker vir Impala gemaak het om met gereelde strafdoele nie te ver agter te raak nie. Al was die Luiperds-blaser se vertoning hoe aanvegbaar, moet UP-Tuks liefes voor eie deur

vee wat hul dissipline betref en onder meer leer om gouer en beter by die skeidsregter se vertolking en toepassing van die reëls aan te pas. Geen span wat sy oog op die kampioenskapskroon het, kan bekostig om in 80 minute 15 punte met strafdoele af te staan nie.

Naka se gestoei teen ERU is 'n tydige waarskuwing vir die ander Blou Bul-spanne wat nog in Reygerpark moet gaan speel. Naka moes bontstaan om die begeesterde tuispan hok te slaan, maar hulle het goed kopgehou en uiteindelik vyf drieë teenoor vier in die oorwinning met 38-32 gedruk. In die Naka-kamp word geglo dat dit goed vir hul span was om dié keer nie so ver as teen vorige Valke-teenstanders te wen nie. Met die oog op die groot plaaslike derby op 7 April teen Quins-Bobbies sal enige nabetraging nou soveel meer sinvol wees.

Dit gaan al hoe beter met Centurion, wat goed herstel het ná die nederlae teen eers Impala en toe Naka. Centurion het sy groot sege oor Brakpan opgevolg deur nog Valke-teenstanders om te dop: dié keer was dit Springs. Centurion het sewe drieë in die sege met 46-19 gedruk.

Die kragmeting tussen QBR en Brakpan is weens die sopnat veldoppervlak van Saterdag na vanaand verskuif. Dit sal verbaas as QBR nie ook 'n voltal teen die beleërde Oos-Randers losspeel nie.

■ UP-Tuks het die 2018-reeks om die Varsitybeker eergisteraand op hul tuisveld met 'n wegholsege oor NMU afgesluit. Met dié oorwinning (82-21) het UP-Tuks van die sesde plek op die puntelyst seker gemaak.

■ In Bellville het TUT sy rieme teen UWK in die Varsityskild-halfeindrondte styfge-loop (66-7).